

Communicaziun a las medias

27avel Top Pop Rumantsch: I dat puspè sulegl...

Cuira, 24.11.2011 – **Suenter Surmeir ed Engiadina fa il Top Pop Rumantsch in gir en il Tujetsch: Pascal Gamboni chanta «Il sulegl a tuts».**

«Tut ae leeiv, sonda blaua, i picla fin ossum la detta». Las chanzuns da Pascal Gamboni, chantadas en pur dialect tuatschin, èn gia adina stadas in pledoyer per la diversitad colorada rumantscha. Questa qua che porta il titel «Il sulegl a tuts» è però er in laudate ad ina tenuta positiva, ubain sco ch'il trubadur di sez, «in'embratschada a la vita, als carstgauns, a l'univers, a l'entir'existenza». Il tun dals artgs, mess a pèr a las solitas ghitarras rockusas, renforza quella tempra affirmativa. E qua quadra er bain ch'il team dal Top Pop Rumantsch ha tschernì per la 27avla ediziun in chantatur detg enconuschent, vivamain celebrà quests dis qua. Sin il pli conferma questa ulteriura schelta «prominenta» ch'i n'existan naginas reglas fixas tar la retscha promotura dal Radio Rumantsch. Il principal è che la musica tunia. U sco Gamboni di: «Ina biala canzun ae ina biala canzun ae ina biala canzun».

Pascal Gamboni, annada 1977, è creschì a Sedrun, nua ch'el ha fundà ensemen cun Curdin Brugger ils Passiunai, ina gruppa clav rumantscha dals ultims onns 90. Il proxim decenni ha lura Pascal vivì en Engalterra, concertond là cun la gruppa Cléan. Ses recents albums solo «Siat vanauns» ed «As fiug» han confermà sia gronda creativitat. Dapi ses return en Svizra agescha il chantatur tranter auter en in program multimedial ensemen cun il literat Arno Camenisch (registraziun publica en ils studios 571/Aquarium a Turitg, ils 8 da december vegnent).

Musica e text: Pascal Gamboni

Producziun: Manfred Zazzi & Pascal Gamboni

Gruppa rock: Sun Gone Mad (Pascal Gamboni, chant e bass; Severin Brugger, gitarra; Richard Lee «Tricky», batteria).

Guppa artgs: Simon Heggendorn, David Schnee



Il sulegl a tuts

tut ae leeiv
sonda blaua
i picla fin ossum la detta

esser beinvegnius
ae schi bi
i picla fin ossum la detta

rumpa la crosa
nus essan tuts fatgs in per l'auter

ed ju lasch tier ei
nuet tema d'emblidar
ple bi soi veiramein betg esser

diltutafatg
cun cor aviert
ple bi soi veiramein betg esser

rumpa la crosa
nus essan tuts fatgs in per l'auter

rumpa la crosa ed o cun la rosa
il sulegl saud'a tuts

Tut ils titels da la seria èn da d'udir sin la pagina da RTR:
<http://www.rtr.ch/home/dossiers/actual/Top-Pop-Rumantsch.html>.

Dapli infurmaziuns:
René Spescha
Tel. 081 255 75 75
E-Mail: rene.spescha@rtr.ch